

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Muir. A. Azim (atba)

01 Mai 2020

07 Ramadhan 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Valeur de Roza dans l'Islam

Le mois béni de Ramadhan li ene faveur d'Allah pour bane musulmans, mais sa li pou vine vraiment ene bienfait seulement kan bane musulmans pou prend li en considération, sans quoi li pas pou servi à rien pour nous. Li insensé ki ene dimoune crier « *Ramadhan, Ramadhan !* » - Ramadhan fine vini - mais ensuite li pas faire nannié plisse ki sa. Dans ene Hadith fine mentionner: « *Si bane dimounes ti conner saki Ramadhan été, alors zot ti pou envie ki l'année en entier ti Ramadhan.* »

Fine également mentionner dans ene l'autre Hadith ki garde Roza pendant Ramadhan et en plus de sa, pendant trois jours de sak mois, sa éloigne de lé cœur bane mauvais l'intentions et bane doutes.

Astaire là faudé ki ena vraiment bane très grands bénédictions même dans Roza, surtout Roza de Ramadhan pour ki bane Sahaba (ra), même en période de guerre pendant Ramadhan, zot ti prend tous bane précautions pour garde Roza [zot pas ti envie râte garde Roza].

Hazrat Salman (ra) raconter ki le Saint Prophète (saws) à la fin du mois de Shabaan, ti faire ene discours avec zot en disant: « *Ô bane dimounes! Zot pou rentre dans ene mois important, ene mois béni, ene mois ki contenir ene la nuit ki meilleure ki mille mois. Allah fine rende so carême (Roza) obligatoire et bane la prières (Salaat) ki faire au cours de so bane la nuits Nawafil (ene surplus volontaire). Quiconque accomplir là-dans ene bon action Nawafil li couma quelqu'un ki observe ene action obligatoire (Faraz) en dehors de sa mois là. Quiconque accomplir ene action obligatoire li couma quelqu'un ki accompli 70 actions obligatoires en dehors de Ramadhan. C'est ene mois de patience. La patience pou être récompensé par admission dans paradis. C'est ene mois de consolation mutuelle, ene mois au cours duquel la subsistance ki accordé au croyant li augmenté. Quiconque donne à ene jeûneur de quoi pou casse so Roza, li pou gagne le pardon pou so bane péchés et li pou être sauvegarder de l'enfer. Li pou être récompensé pour sa acte là sans ki so récompense initiale diminué. »*

En écoutant sa bane Sahaba fine dire: « *Ô prophète d'Allah (saws), nous tous nous pas ena kitchose pou donner [comme iftaar] à ene Rozédaar. »*

Le Saint Prophète (saws) fine réponde: « *Iftaar pas veut dire donne manger à ene telle point ki l'estoma rempli parski même en donnant ene datte ou ene tiguitte de l'eau, Allah (swt) pou accorde zot so récompense. »*

Sa mois là li divisé en trois parties:

- 1) Premier 10 jours apporte la bénédiction d'Allah.
- 2) Deuxième lotte 10 jours apporte le pardon d'Allah.
- 3) Troisième et bane derniers 10 jours apporte la libération du feu de l'enfer.

Ena quatre kitchoses ki nous bizin faire le plus souvent possible, voire continuellement pendant sa mois là. Deux d'entre zot pour le contentement d'Allah, en l'occurrence:

- 1) Attester ki na pas ena aucaine les autre bondié aparte Allah (Récite le *Shahada*).
- 2) Demande So pardon (Faire *Istigfaar*) en grande quantité.

Et les deux les autres ki zot bizin constamment faire zefforts pou faire sa forme partie de zot mêmes, de zot la vie:

- 3) Recherche le paradis et
- 4) Cherche refuge contre l'enfer.

Sa quatre kitchoses là zot réuni dans la formule suivante: **Laa Ilaaha illallah astaghfirullah as-'alukal jaanah wa aouzubika minan-naar.**

Zot bizin conner ki le jeûne (*Roza*) c'est l'abstinence (*imsak*) et l'exaltation (*rif'a*). Roza fine être appelé coumsa (*rif'a*) parski li arrive à ene telle grand stage kot li dépasse tous bane les autres actes d'adoration. Allah (swt) fine élève li en niant kit ressemblance entre li (Roza) et sa bane les autres actes d'adoration là. Li (Allah) fine place la récompense de celui ki qualifier li-même par le Roza, dans So propre la main et fine faire li vine pou Li (Allah). Allah fine rattache le jeûne à Li-même, kot Li fine rallier li (Roza) avec So propre ressemblance! [*pas par So transcendance complet mais partielle*].

Le jeûne li pas ene acte mais l'abandon d'ene acte (*tark*). La négation de toute ressemblance li en li-même ene attribut négatif saki renforce l'analogie entre Roza et Allah.

Allah (swt) fine dire à So propre sujet: « **Nannié pas semblable à Li.** » (Surah Ash-Shura 42 : 12).

Allah fine nié ki Li ena ene « semblable ». Aussi bien ki l'intellect crée et la loi sacrée indiquer ki Allah pas ena aucaine semblable, personne pas ressembler Li ou ki ena même pouvoir et capacité ki Li. Li Unique. Ena ene sel Allah. Li tousel. Un point c'est tout.

Nasāi rapporte sa parole de Abu Umama: Mo fine approche du Messenger d'Allah (saws) et fine dire li: « *Donne moi ene l'ordre ki mo pou prend directement de toi.* » Li fine réponde: « *Pratique le jeûne (Roza), parski li pas ena kit [les autres actions] ki semblable à li.* » Li fine nié ki ene lotte acte quelconque capave être comparer avec li de parmi bane actes ki Allah fine prescrire à So bane serviteurs. C'est pourquoi Allah (swt) fine dire: « *Tout bane actes de garçon Adam (c'est-à-*

dire, l'homme) appartenir à li à l'exception de Roza parski sa li pou Moi et c'est Moi ki pou donne so récompense. »

Le jeûne li ene bouclier: si ene d'entre zot garde Roza ene jour, li bizin abstenir sa jour là de bane propos indécents et de bane cris, bane disputes dans vide. Si quelqu'un insulter ou tombe lors li, li bizin dire: « *Mo ene dimoune ki pé garde Roza, Mo ene Rozédaar.* » Par celui qui tenir l'âme de Muhammad (saws) dans So la main, en vérité l'haleine ki sorti de la bouche d'ene Rozédaar li pou pli parfumé pour Allah, au jour du Jugement Dernier, ki parfum musc. Deux la joies appartenir au Rozédaar: Kan li casse so Roza, li réjouir de sa rupture de jeûne là (*bi-fitri-hi*) et kan li rencontre so Seigneur (swt) li réjouir de so jeûne (*bi-saumi-hi*).

Zot bizin conner aussi ki le Rozédaar rencontre so Seigneur au moyen de la qualification « **Nannié pas ressembler Li** »: d'ene part, le Messager d'Allah (saws) fine nié kit comparaison possible avec Roza d'après le hadith de Nasai, de l'autre côté (d'après saki Quran dire d'Allah), « **Nannié pas semblable à Li.** » La joie d'ene Rozédaar alors tenir à so rattachement au degré de la non-similitude!

Dieu attribuer à Li-même le jeûne (Roza) en disant : « **... à l'exception de Roza, parski li pou Moi** ». C'est-à-dire : l'attribut *As-Samad*, ki indique l'indépendance (*tanzih*) à l'égard de la nourriture, appartenir zis pou Moi (Allah); si Mo accorde toi li, li exprime uniquement ene aspect conditionné de la transcendance (*tanzih*), et non pas la transcendance absolue ki convenir **zis** à Mo Majesté. C'est Allah (swt) ki vine la récompense de Roza kan le Rozédaar retourne vers so Seigneur et rencontre Li avec la qualification « **Nannié pas semblable à Li** ». C'est-à-dire avec Roza. Ensuite Allah, ki Li-même fine établir tous bane la lois, Li énonce à l'encontre d'ene Rozédaar ene interdiction ki marque li-même ene abandon et ene qualification négative, en disant: Sa Rozédaar là bizin abstenir li de bane propos indécents, de bane disputes, bane la guerres remplies de la haine et de jalousie, et de bane cris, bane chantés, faudé pas li élève so la voix et riyé fort. Faudé li montrer respect pour sa mois de grâce et de bénédiction divine là. Allah pas fine ordonne ene acte mais Li fine interdit pou accomplir certains actes. Comme le jeûne (*Roza*) li ene abstention, ena ici ene relation significatif entre li et saki fine alors défendu à sa Rozédaar là.

Ensuite, sa Rozédaar là fine recevoir l'ordre pou dire à celui ki insulter li ou ki rode chicane avec li : « *Mo pé garde Roza !* » - C'est-à-dire « *[Mo] dans ene l'état kot*

mo fine abandonne sa action ki toi to pé faire là, Ô toi ki pé fatigue moi et pé zoure moi ! »

Lors l'ordre de so Seigneur (Rab), sa Rozédaar là là li élève li (*nazzaha*) au-dessus de sa l'envie pou riposter, pou la guerre li aussi là et li annoncer ki li pé abandonne ene telle action ; autrement dit, pas ena kot li ni insulte ni ene volonté pou la guerre. Muslim rapporte sa hadith ki transmette par Sahl bin Sad: Le Messenger d'Allah (saws) fine dire : « *En vérité, ena dans paradis ene la porte ki appelle Ar-Rayyaan: c'est par sa la porte là ki bane Rozédaar pou rentrer le Jour de la Résurrection. Personne aparte zot pas pou rentre par là. Pou faire sa l'appel là : 'Kot bane ki habituer garde Roza, pour ki zot rentre par là ?' Lorsque le dernier parmi zot (sa bane Rozédaar là) pou rentrer, alors sa la porte là pou fermer et plus personne pas pou passe par là. »*

Hazrat Muhammad (saws) pas fine dire sa pour aucaine les autres actions ki fine faire l'objet d'ene l'ordre ou d'ene défense à l'exception de Roza. Li fine montré clairement, par sa mention de Ar-Rayyaan, ki bane Rozédaar pou atteindre la perfection dans le domaine de bane actes d'adoration: zot pou qualifier zot-mêmes par saki na pas ena so semblable, et en vérité, saki na pas ena so semblable li en réalité parfait.

Le fait pou être ferme et endurant dans la foi décrire sa l'état du croyant kot li tellement épri [li trop attacher] avec so la foi dans Allah, ki aucaine épreuves pas pou capave faire li flancher ou succomber. Dans sa l'état là, la droiture li-même change d'aspé; en effet, l'effort ki li exercé, la répugnance ou le dégoût ki généralement éprouvé au moment kot bizin faire bane bonnes actions, tout sa bane dégoût et répugnance là disparaite complètement, et à partir de là, z'effort li népli nécessaire. Dès sa moment là, pareil couma bane aliments, bane actions pieuses pou nourri so l'âme, et sans sa bane actions pieuses là, l'âme pou alle mort en quelque sorte. Sa degré de fermeté dans la foi là, ki évidemment surhumain, li dépasse le cadre de l'effort de l'homme, et sa telle fermeté dans la foi là alors, l'homme pas pou capave gagne sa même par li-même, par so propre z'effort. Pareil couma l'âme, sa type de fermeté et d'endurance là li ene don, ene grâce ki si ene kikaine gagne sa, alors li bizin bien penser ki sa vine de Allah même sa. C'est Allah ki accorde li tout sa fermeté surhumain dans la foi, ki pas ressembler la foi ki bane les autres dimounes ena dans Li (Allah).

Donc le jeûne li l'essence même et le sommet de tout adoration. Li amène directement au but de l'existence. Li permette aussi à l'homme pou rempli so bane obligations envers les autres dimounes ainsi ki envers Allah, d'ene façon parfait. Malheureux bane ki gagne sa mois là mais ki pas tire aucaine profit et aucaine bénédiction divine de sa.

Rappelle zot pou faire toujours bane telles supplications ki pou arrive ziska les ciels, c'est-à-dire, ki pou arrive ziska Allah et So bane anges. Bane anges d'Allah diffuse sa bane supplications là à travers le monde entier. Bane membres du Jamaat Ul Sahih Al Islam bizin considérablement hausse le niveau de zot *Salaat* (prières). Et zot bizin hausse aussi le niveau de zot Roza (*Saum*) aussi.

Roza li après le Hajj le plus distingué de bane formes d'adoration (*d'Ibaadat*); le *fidya*, compte ene aspect obligatoire et ene aspect volontaire. Bane la portes de l'enfer ki, d'après bane hadiths zot fermé pendant le mois de Ramadhan zot en fait les cinq sens de l'homme. Le jeûne islamique li ene bouclier contre bane péchés. Le fait pou néglige Roza li ene manquement bien sérieux. Habituer zot bane zenfants pou faire au moins deux *Rakaat* Salaat-ul-Tahajjud avant prend *Sehri*.

Avant mo terminer, mo partage avec zot, détrois révélations ki mo fine recevoir de la part d'Allah sa semaine là. Bane révélations là en français, en Arabic et en anglais, alors mo donne zot ene traduction de sa :

Bismillah-ir-Rahman-ir-Rahim

RÉVÉLATIONS DIVINES

Lundi le 27 Avril 2020 à 1.45pm après Zohr (3^{ème} Roza), dans ene Kashaf, mo entende ene la voix fort dans le Bait-ul-Zikr ki dire (en français): « **To même To le Khalifatullah lors sa la terre là, pareil couma Hazrat Adam (as) ti été dans so l'époque. Mo pou béni toi et Mo pou protège toi et Mo pou donne toi la victoire. Aujourd'hui c'est ene jour béni; bane dimounes trouve en toi seulement to bane défauts, mais Moi Mo trouve To l'amour pour Moi. Petit à petit, Mo pou transforme to bane défauts en bons qualités. To fine vine le roi de la terre. Mo pou enseigne toi le règne de Mo Trône. »**

Mercredi le 29 Avril 2020 après Namaz Tarawee, mo recevoir sa révélation (en anglais) là avant mo alle dormi : « **Le Mohyuddeen Khalifatullah fine vini pou tourne ene le monde associé en ene mot universel, c'est-à-dire, Laa Ilaaha Illallah. Le meilleur des hommes c'est celui ki reconnaite Mo signe kan Mo fine envoie li. Le meilleur des hommes c'est celui ki reconnaite Mo l'unicité. Le meilleur des hommes c'est celui ki accepter saki Mo fine envoie zot pour zot propre bienfait, sans ki zot protester. »**

Et Jeudi le 30 Avril 2020 à 4.35pm (6^{ème} Roza), mo recevoir sa bane duahs là (en Arabic et Anglais) :

**Rabbijalnee ghaaliban alaagharee
Rabbih faznee fa-innal qawma yatta-dhu-nanee sukh-ratan.**

O mo Rab, donne moi la force contre mo bane opposants.

O mo Rab, protège moi parski sa peuple la fine décide pou riye [ou moque] moi.

Mo faire beaucoup *duahs* pour zot, afin ki zot profite au maximum sa mois béni de Ramadhan là, *Insha-Allah*. Ki Allah combler zot tous de So bane bienfaits et faire zot rentre dans So Miséricorde et faire zot témoigne de sa lien exceptionnel ki rattache le Rozédaar musulman ki sincère à Li. *Insha-Allah, Ameen.*